



Inatsisartunut ilaasortaq, Simigaq Heilmann
Demokraatit

inatsisartut@inatsisartut.gl

§ 37 naapertorlugu apeqcutip nr. 143_2020-p akineqarnera

Inatsisartut suleriaasissaanni § 37, imm. 1 naapertorlugu qimmit qimuttut pillugit Naalakkersuisunut apeqqutinik saqqummiussa qarputit. Apeqqut suliaasaqarfigisannit akineqartussanngorlugu innersuunneqarpoq.

1. Qimmit qimuttut kiisalu qimmeqarneq qitsuuteqarnerlu pillugit inatsisaat nr. 18, 30. oktober 1998-meersoq, §6-mi allassimasumi nakkutilliisutut allaqqasut inuillu taama immikkut piginnaatitaasut kinaassutsiminnik uppersaateqartut kikkuuppat? (Piffiit assigiinngitsuni allattorsimaffinngorlugu perusuppara)

-Allattorsimaffeqanngippat sunamita peqqutaava?

Akissut:

Aalajangersagaq § 6-imiittoq oqartussaasunut §§ 4 aamma 5-imi taaneqartunut sammititaavoq. Qimmit qitsuillu isumagineqarnerat illersorneqarnerallu Naalakkersuisut Kommunalbestyrelsillu avillugu oqartussaaffigivaat. Oqaaseqatigiinniittoq "immikkut piginnaatitaasoq" sulisunut suliaasaqarfiup taassuma iluani atorfilinnut akisussaasunut piginnaatinneqartunullu tunngavoq. Tassani Uumasunut Nakorsaqaqarnermut Inuussutissalerinermullu Oqartussaqaqarfinni pisortani atorfillit pineqarput.

Namminersorlutik Oqartussani suliaasaq tamanna Uumasunut Nakorsaqaqarnermut Inuussutissalerinermullu Oqartussaqaqarfinni isumagineqarpoq. Kommunini tamanna qimmeqarnermut inspektørimit sulisunillu allanit kommunini aqqis-suussineq apeqqutaalluni isumagineqarpoq, taakkualu immikkut piginnaatitsissut § 6-imi taaneqartoq piginngilaat.

Inunnut allattuiffimmik kissaateqarnermut tunngatillugu taanna nassiussinnaanngilarput, tassa Uumasunut Nakorsaqaqarnermut Inuussutissalerinermullu Oqartussaqaqarfiup immikkut piginnaatitsissut taanna kommunini atorfilinnut tunngatillugu § 6 atorsimanngimmassuk.

2. Qimminik allanertanik pasittaassisoqartillugu periusissat eqqortut tulleriissarlugit suuneri paaserusuppakka.

Ulloq: 25-08-2020
Suliap normua:
2020 - 14372
All. nr. 14662628

Postboks 269
3900 Nuuk
Oqarasuaat (+299)
34 50 00

Akissut:

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumi § 5-imi taaneqarpoq peqqussinerit inerteqquteqarnerillu ilaatigut § 19-imi piumasaaqatit eqqortinneqartussat qulakkeernissaannut pisariaqartutut isigineqartut kommunalbestyrelsimit nalunaarutigineqassasut, tassanilu aalajangersarneqarpoq qimuttunik qimmeqarfiit kalaallit qimmiinut qimuttunut atugassaasut.

Suliaqarnermi pasitsaassaqarneq Uumasunut Nakorsaqaqarnermut Inuussutissalerinermullu Oqartussaqaqarfiup, kommunip politiillu suleqatigiilluarnersigut isumagineqartussaavoq, tassanilu pisoq nalilerneqartarpoq suliniutissallu attuumasutillit aallartinneqarlutik.

3. Kommuni qimmeqarneq qitsuuteqarnerlu pillugit inatsimmi §13 malillugu ileqqoreqqusalior-tussaatitaavoq, kommunit tamarmik ileqqoreqqusaqarpat

-Nakkutilliisussaasutit kommunit ileqqoreqqusaqanngitsut qanoq iliorneqartarpat?

Akissut:

Avannaata kommunia aamma Kommune Qeqertalik qimminut qitsunnullu ileqqoreqqusamik tamanut saqqummiussaqaarsimanngillat.

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumi § 28, imm. 2 § 13-imik unioqqutitsisoqarnerani akileeqqusinermut aalajangersaanissamik periarfissii-voq.

4. Inatsit malillugu §14-mi qimmit qitsuillu illersugaasut allassimavoq. Qanoq ililluni qulakkeerneqarsinnava qimmeq qimuttoq illoqarfiup avataanut pitutaq ulloq unnuarlu isumannaattumiittoq?

-Isumannaallisaaneq nakkutiginninnerlu tamakkiisoq eqqarsaatigalugu qimmiutillip pisussaaffiisa saniatigut suut kommunip naalakkersuisul-luunniit naammassisussaavai?

-Inatsimmi Naalakkersuisut kommunalbestyrelsillu maleruaqqusalior-sinnaasut allapput, ersarissumik paaserusuppara sorliit naalakkersuisut kommunillu akisussaaffigivinneraat.

Akissut:

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumi § 14 § 15-imut qanimut attuumassuteqartutut isigineqassaaq, tassanilu taaneqarpoq kinaluunniit qimmeqartoq qitsuuteqartorlu uumasut isumannaatsumik pineqarnissaannik

isumagisaqassasut. Kommunalbestyrelsi ilaatigut § 15-imi piumasaqaatit aalajangersarneqartut eqqortinnissaasa qulakkeernissaannut peqqusinerit inerteqquteqarnerillu pisariaqartutut isigineqartut kommunalbestyrelsip nalunaarutigisussaavai.

Nunaminertanut pilersaarutit, tassunga qimmiliviit sumiinnerinut tunngatillugu aalajangersakkat ilanngullugit, kommuninit suliaassaapput.

Qimmit ulluinnarni nakkutigineqartarnissaat qulakkeerniarlugu qimminut qimmi-livinnullu ajornanngitsumik isersinnaanerup qanoq pingaaruteqartiginera Uumasunut Nakorsaqaqarnermut Inuussutissalerinermullu Oqartussaqaqarfiup arlaleriarluni innersuussutigalugulu suliatigut tunngavilersortarsimavaa.

Kommunit qimmit qitsuillu pillugit ileqqoreqqusaat pillugit Namminersorne-rullutik Oqartussat nalunaarutaanni nr. 15 ulloq 19. juni 2003-meersumi aalajangersakkanik sunik kommunalbestyrelsi isumagisaqassanersoq nassuiar-neqarpoq.

Naalakkersuisut akisussaanerat Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat nr. 18, 30. oktober 1998-imeersumi § 4-mi nassuiarneqarpoq.

Ilaatigut akisussaanerit agguataarnissaat aamma oqartussaasuni pisussaaffiit ersarinnerulersinniarlugit suliaasaqarfimmut inatsisit nutaat suliarlugit aallartinneqarsimapput. Nassuerutigisariaqarpoq inatsimmi 1998-imeersumi pissutsit ilumoortut tamakkerlugit ilaatinneqarsimanngimmata.

5. Qimmit qimuttut mikrochipilersorneqarnerat qanoq aningaasatigut ukununnga kinguneqarpa:

- **Inuinnaat qimmiutillit?**
- **Pisortat?**

Akissut:

Qimminut qimuttunut mikrochipimik nalunaaqutsiisarnerit Namminersorlutik Oqartussanit akilerneqarput, qimminillu piginnittumut akeqarnani. Qimmit qimuttut peqqinnerulernissaat atugarissaarnerulernissaallu anguniarlugit kimit pigineqarnerat kiisalu akiuussutissamik kapitissimanersut nalunaarsuiffigi-niarlugit qimmit qimuttut tamarmik mikrochipimik nalunaaqutsersimanissaasa qanoq pingaaruteqartiginera matumani pineqarpoq.

Ukiumut mikrochipit nutaat 4.500-t atortarnissaat naatsorsuutaavoq, taakkulu Nunatta Karsianut 219.000 kr.-inik aningaasartuuteqarfiussapput (akit 2020-meersut tunngavigalugit).

6. Ilumoorpa uumasut nakorsaata aaliangernikuugaa qimmit nujuartat katassimasut tiguneqarneq ajuleraangata sininnartumik pisinnaanerat unitsinneqarsimasoq?

-Ilumoorpat, suna tunngavigalugu taama aaliangertoqarpa?

Akissut:

Uumasunut nakorsaatinik tunniussisarneq uumasut nakorsaannit isumagineqarpoq. 2010-p kingorna qimmit angalaannartut tiguniarnerannut sininnartunik atuinissaq periarfissaqarsimangilaq. Tamatumunnga pissutaasut arlaqarput. Nakorsaat atorneqartoq arlaleriarluni atonerlunneqartarsimavoq, nakorsaat kigaatsumik sunniukkiartortarpoq qimmip ajoqusernissaanut navianaateqartorujussuulluni, nakorsaallu pissarsiarineqarsinnaajunnaarsimalluni.

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumi §§ 14 aamma 15 kiisalu Uumasunik illersuineq pillugu Inatsisartut inatsisissaattut nr. 25, 18. december 2003-meersumi §§ 1 aamma 3 innersuussutigalugit qimmerisat taamatut tiguniartarnerat inatsisinik atuuttunik unioqqutitsinertut isigisariaqarpoq. Uumasunut Nakorsaqarnermut Inuussutissalerinermullu Oqartussaqaarfiup inassutigivaa qimminik pitsaasumik akuulersitsiniarnikkut perorsaanikkullu qimmit atugarissaarnissaat piginnittuminnullu ataqqinninnissaat qulakkeerneqassasut, taamaaliornikkut qimmit ajornanngitsumik utertinneqarsinnaassammata.

Qimminut kiisortunut tunngatillugu Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumi § 10 ersarilluinnartumik oqariartuuteqarpoq, tassalu qimminik kiisortunik qimmiuteqarnissaq inerteqqutaasoq.


7. Ullut nutaaliasut eqqarsaatigalugit qimmeqarneq pillugu atuarfeqarfinni imaluunniit qimmit qimuttut pillugit paasititsiniaaneq annerusoq takorloorneqarnikuunerluni?

Akissut:

Uumasunut Nakorsaqarnermut Inuussutissalerinermullu Oqartussaqaarfik assersuutigalugu akiuussutissanik kapisinermut atatillugu qimmeqarneq pillugu paasissutissiiuarpoq. Tamatuma saniatigut Sullissivimmi paasissutissaateqartoqarpoq. UNIO qimminut inspektørit/qimminut akisussaasut pitsaanagerusumik atitunerusumillu ilinniartittarnissaat pillugu kommuninik qanimut suleqateqarpoq, taamaaliornikkut najukkani qimminik qimuttunik taakkualu peqqissusaannik nakkutiginninneq annertusineqarsinnaammat. Siunissaq eqqarsaatigalugu qimminut inspektørit/qimminut akisussaasut ilinniartitaanerisa atuarfimmi atuarnikkut aaqqissugaasarnissaa kissaatiginassagaluarpog, taamaaliornikkummi

najukkani qimmit peqqissuunissaat paarineqartarnerallu qitiutinneqarsinnaassagaluar mata. Tamatuma saniatigut suliniummik ataatsimoorfiulluartumik sulissuteqarnissaq Naalakkersuisut takorluugaraat, tamannalu aqqutigalugu kalaallit qimmiata qimuttup uumasutut immikkuullarissutut aamma kulturikkut piniartut/aalisartut ileqquattut piginnarnissaa qulakkeerneqassamat nukittorsaaffigineqarlunilu. Tassungalu atatillugu kalaallit qimmiata qimuttup siunissami piginnarnissaa pillugu misissuinerup aallartinnissaa nuannaarutigalugu utaqqimaarneqarpoq, tamannalu 2020-mi upernaakkut ataatsimiinnermi akuersissutigineqarsimavoq.

Inussiarnersumik inuulluaqqusillunga



Jens Immanuelson

Aalisarnermut, Piniarnermut Nunalerinermullu Naalakkersuisoq